

Pled d'avertura da la sessiun da zercladur 2023

President dal Cussegl grond Tarzisius Caviezel

(Valair vala il pled discurre)

Stimadas deputadas e stimads deputads

Stimadas collegas e stimads collegas

Stimada commembra e stimads commembers da la Regenza

Preziads giasts sco er collavuraturas e collavurats da las medias

Dapi l'ultima sessiun dal Cussegl grond avain nus passentà mais fitg commovents. Adina puspè s'avran novs munds cun midaments. Sco en in gieu da computer? Cun novs munds na manegel jau betg en emprima lingia nossa occurrenza qua a Clausta. Er sche jau speresch che nus possian scuvrir per nus insatge nov qua a Clausta. Tar quai ditg jau pli tard anc dapli.

Novs munds s'avran sin plaun global, naziunal e chantunal. En noss mund, sco nus al enconuschain, valeva dapi passa trais decennis il motto «midadas tras commerzi». Ils gudogns da l'economia globala che resultan tras la globalisaziun, duevan ir a favur da tuttas e tuts. Gudogns e colliaziuns economicas vicendaivlas duevan procurar per l'interess al martgà e per in urden politic cun premissas stabilas, quai cun rinforzar la stabilitad e l'urden internaziunal. Questa visiun da las societads che s'orienteschan principalmain a las valurs dal vest, va plaunet vers la fin.

La pandemia, la gronda guerra europeica e las pretensiuns imperialas da la Russia e da la China han per consequenza, ch'il model internaziunal «midadas tras commerzi» ch'è s'establi per in svilup stabil da la cuminanza mundiala, va sutsura. En il rom da l'attatga russa han ils stadis europeics bandunà las funtaunas d'energia ed il commerzi cun la Russia. Per quai han ins stuì acceptar sforzs massivs, relaziuns da stgarsezza, custs supplementars e pretschs creschents – oravant tut en il sector d'energia.

Ils Europeans èn actualmain occupads cun las consequenzas d'ina China ch'è pli e pli segira da sasezza e che sa preschenta en moda militar. Las dependenzas dal commerzi internaziunal èn qua anc pli impurtantas che cun la Russia. Fabricats industrials, cumponentas da computers, medicaments – en in tschert senn pudess resultar ina situaziun sumeglianta sco cun las mascrinas al cumenzament da la pandemia dal coronavirus.

Tge vul quai ussa dir per nus? Entant ch'ils stadis europeics prendan per mauns questas dumondas en l'entira Europa, co ch'ins pudess pia realisar la segirezza economica en la federaziun da stadis europeica, duai la Svizra – sco pitschen spazi economic – realisar suletta questa segirezza? È nossa economia insumma buna da far quai, e quant duai quai custar? Resulta qua tras in'economia planifitgada?

Quest patratg n'è betg uschè dasperas, sco quai ch'el tuna il mument. En l'economia d'energia van nossas stentas exactamain en la direcziun da rinforzar nossa independenza, quai cun custs supplementars enorms er per l'ambient e per la societad. Reusseschi

insumma a nus da segirar cun atgnas forzas noss bainstar ch'è sa stabili sin la globalisaziun, sche la globalisaziun na funcziuna betg pli, sche nus vegnissan sancziunads, en cas che nus importassan products dal pajais X? Nus stuain esser abels da producir e da sviluppar vinavant sezs medicaments, victualias, energia, cumponentas da computer e.u.v.

Qua sto la Svizra ponderar intensivamain, co che la via che ans maina en il proxim futur, duai guardar ora. Schebain nus duain ans avischinar ad ina federaziun da stadis u schebain nus duain prender la via solitaria. Manegiais Vus che quai saja tut lunsch davent dal chantun Grischun? Che quai n'ans pertutgia betg?

Igl è bain crass, sche l'ovra electrica d'ina gronda vischnanca grischuna, ch'è a 100 pertschient en proprietad communal, na po betg pli furnir forza electrica a la proprietaria, pia a l'atgna vischnanca, e che la vischnanca vegn sfurzada da concluder in contract da plirs onns cun ina firma d'energia da la concorrenza extrachantunala. La dumonda na correspundeva betg a l'atgna producziun resp. n'è betg vegnida segirada cun agid d'in contract surordinà. Igl exista in basegn d'agir sin plaun communal, chantunal, federal ed europeic.

As regurdais Vus anc da la CS? Quella instituziun svizra fitg segira da sasezza? Las chapitschas da la CS eran in element da l'equipament dals clubs da skis ed ina part da l'olma dal pievel. La CS – i n'è anc betg passà bler temp – la gronda CS devi anc durant l'ultima sessiun dal Cussegl grond. Ella è ida sutsura andetgamain, exista mo pli sco sector da fatschenta entaifer la UBS, orchestrescha cun l'administraziun federala, cun il Cussegl federal e cun bancas centralas. Deplorablamain n'è quai betg stà ina procedura unica. Gia la salvadra dad oz, la UBS, ha sezza stuì vegnir salvada l'onn 2008 da l'administraziun federala e d'auters. Definitivamain fatg naufragi ha però la Swissair. Dal rest: Davart il naufragi da la Swissair e davart il salvament da la UBS n'han ils presidents dal Cussegl grond da quella giada fatg naginas remartgas en lur plets d'avertura – la politica da scola e d'agricultura dal Grischun eran quella giada memia impurtantas. Jau pens che nus stuain drizzar oz nossa atenziun sur ils cunfins chantunals ora.

Da las crisas globalas e svizras èn las Grischunas ed ils Grischuns pertutgads gist tuttina, sch'i va per las consequenzas e per l'atgna incorrectezza. Jau regord a l'exempel gia numnà d'ina ovra electrica locala. Suenter numerus sbagls da management che parevan l'emprim cumediantics ed infantils, ha la CS pers l'equiliber, perquai che la confidenza da la clientas e dals clients è ida a perder, uschia ch'ellas ed els han retratg grondas summas da daners da la banca. Pir lura ha il management senti, ch'ils daners pon svanir pli svelts che quai ch'ins stabilescha puspè confidenza.

Questa confidenza hai jau menziunà gia pli baud, en il pled d'avertura da la sessiun da favrer. Ella è fundamentala, er per nossa lavur. Er las instituziuns chantunals dovran confidenza e ston – cun lur mussament da prestaziun – far di per di sforzs per mantegnair questa confidenza. Jau accentuesch quai anc ina giada, senza dentant vulair entrar anc ina giada en ils detagls. La confidenza è la basa da noss model da fatschenta democratic.

E lura datti er anc eveniments da l'autra vart da las incumbensas quotidianas che pertutgan l'economia e la politica. Il vitg da Brinzauls è periclità d'in pachet da crappa gigantic, che sa

muventa adina pli svelt. Questa situaziun difficila han las autoritads e las personas pertutgadas dumagnà fitg bain fin ussa. Mesiras adattadas, basas da datas professiunalas, structuradas cleras ed ina communicaziun transparenta – quai è il fundament per la confidenza da la populaziun. La vischnanca ed il chantun procuran communablamain, che nagin na vegnia sut las rodas. Cun pass bain ponderads e senza hectica reusseschi a Brinzauls resp. a la vischnanca dad Alvra da divider la gronda sfida en pass parzials superabels e d'obtegnair grond respect.

Per il president communal Albertin è la cuminanza da las instituziuns e da las singulas personas obligada d'agir cuminaivlamain, quai sco garanta per la stabilitad sociala e per l'agid. Durant las ultimas emnas hai jau, sco president dal Cussegl grond, dastgà represchentar il chantun ad intginas radunanzas annualas d'associazions chantunalas. A chaschun da questas occurrenzas èsi dà en egl, quantas personas che s'engaschan, ch'èn responsablas per in resultat cumplessiv ed a tge prestaziuns – schizunt cun lavur voluntara – che nossa societad è abla.

Questa sessiun, stimadas dunnas e stimads signurs, tegnain nus extra muros. La vischnanca da Clastra ha envidà il Cussegl grond d'entrar en contact cun la vischnanca gualsra dal Partenz. Profitai da l'ocasiun d'emprender d'enconuscher la populaziun da Clastra, la natira magnifica e spaziusa, ma er ils restaurants alpins da Clastra, l'ospitalitad e l'engaschament per ils giasts sco er las sfidas actualas da questa vischnanca. L'onnn passà ha la vischnanca festivà intensivamain il giubileum dad 800 onns Clastra. Ins sto savair bun grà a la gruppa d'iniziants da Clastra, ch'ella n'ha betg remess ses engaschament communal suenter las festivitads da giubileum opulentas da l'onnn passà, mabain ha ussa prendì la politica chantunala cun la sessiun extra muros sco occasiun per in'occurrenza. Onurai per plaschair quest engaschament e resguardai ils invits a las differentas purschidas.

Per quests dis ans giavisch jau ussa lavurs captivantas ed orientadas al progress e decler la sessiun sco averta.